


日日之函入


景德齋燈

十九

土岐文庫  
文庫17  
W17  
10







Red stamp, top left corner.

Red stamp, top center.

Faint, illegible text in columns within a blue border on the left page.



Red stamp, bottom center.





文庫 17  
W17  
10



景德傳燈錄卷第十九

益州宋沙門道原纂

吉州青原山行思禪師第六世

福州雪峯義存禪師法嗣四十二人

三十一人見錄

福州安國弘瑫禪師襄州雲蓋山歸本禪師

韶州林泉和尚洛京南院和尚

越州洞巖可休禪師定州法海院行周禪師

杭州龍井通禪師漳州保福從展禪師

泉州睡龍道溥禪師杭州龍興寺宗靖禪師

福州南禪契璠禪師越州越山師彙禪師

景德傳燈錄卷第十九



昭和六十年二月一日  
法政大學庶民部  
寄贈

010185192836



南嶽金輪可觀禪師

泉州福清玄訥禪師

韶州雲門文偃禪師

衢州南臺仁禪師

泉州東禪和尚

餘杭大錢山從襲禪師

福州永泰和尚

池州和龍山守訥禪師

建州夢筆和尚

福州古田極樂元儼禪師

福州芙蓉山如體禪師

洛州京憩鶴山和尚

潭州瀉山棲禪師

吉州潮山延宗禪師

益州普通山普明大師

長隨州雙泉梁家庵永禪師

漳州保福超悟禪師

太原李上座

南嶽惟勁禪師

台州十相審超禪師

江州廬山訥禪師

新羅國大無為禪師

潞州玄暉禪師

湖州清淨和尚

益州永安雪峯和尚

益州懷果禪師

撫州明水懷忠禪師

嵩山安德禪師

杭州耳相行修禪師

已上一十人無

機緣語句不錄



青原山行思禪師第六世

福州雪峯義存禪師法嗣

福州安國院明真大師弘瑫，泉州人也。姓陳氏，幼絕葷茹，自誓出家。於龍華寺東禪，始圓戒體，而造于雪峯。雪峯觀其少儻，堪為法器，乃導以本心。信入過量，復徧參禪苑，獲諸方三昧。卻迴雪峯，雪峯問什麼處來。曰：江西來。雪峯曰：什麼處見達磨？曰：分明向和尚道。雪峯曰：道什麼？曰：什麼處去來。一日，雪峯見師，忽擲住，曰：盡乾坤，是箇解脫門。把手教伊入，不肯入。曰：和尚怪弘瑫，不得。雪峯曰：雖然如此，爭奈背後許多。

師僧何師，因舉國師碑文云：得之於心，伊蘭作栴檀之樹，失之於旨，甘露乃蒺藜之園。拈問僧曰：一語須真得失兩意。汝作麼生道？僧舉拳曰：不可喚作拳頭也。師不肯，亦舉拳別云：只為喚這箇作拳頭。師受請止，困山毳徒臻集。後聞師嚮師，道德命居安國寺。大闡玄風，徒餘八百矣。僧問如何是西來意？師曰：是。卽是莫錯會。問如何是第一句？師曰：問問學人上來。未盡其機，請師盡機。師良久，僧禮拜。師曰：忽到別處。人問汝作麼生舉？曰：終不敢錯舉。師曰：未出門已見笑。具問如何是達磨傳底心？師曰：素非。後躡問如何。



是宗乘中事師曰不可爲老兒散卻衆也問不落有無之機請師全道師曰汝試斷看尙如何是一毛頭事師拈起袈裟僧曰乞師指示師曰抱璞不須頻下淚來朝更獻楚王看問寂寂無言時如何師曰更進一步問凡有言句皆落因緣方便不落因緣方便事如何師曰桔槔之士頻逢抱甕之流罕遇問向上一路千聖不傳未審和尚如何傳師曰且畱口喫飯著問如何是高尚底人師曰河濱無洗耳之叟磻溪絕垂釣之人問十二時中如何救得生死師曰執鉢不須窺衆樂復冰何必步參差問學人擬問宗乘師還

許也無師曰但問僧擬問師乃喝出問目前生死如何免得師曰把將生死來問知有底人爲什麼道不得師曰汝爺名什麼問如何是活人之劍師曰不敢瞎卻汝曰如何是殺人刀師曰只這箇是問不犯鋒鏑如何知音師曰驢年去問苦澀處乞師一言師曰可殺沉吟曰爲什麼如此師曰也須相悉好問常居正位底人還消得人天供養否師曰消不得曰爲什麼消不得師曰是什麼心行曰什麼人消得師曰著衣喫飯底消得師舉棧和尚住招慶時在法堂東角立謂僧曰這裏好致一問僧便問和尚爲何不居正位



稜曰爲汝恁麼來曰卽今作麼生稜曰用汝眼作麼  
師舉畢乃曰他家恁麼問別是箇道理如今作麼生  
道後安國曰恁麼卽大衆一時散去得也師亦自代  
曰恁麼卽大衆一時禮拜

襄州雲蓋山雙泉院歸本禪師

亦曰西雙泉以隨京州有東雙泉故也

兆府人也幼出家十六納戒念法華經初禮雪峯雪  
峯下禪牀跨背而坐師於是省覺僧問如何是雙泉  
師曰可惜一雙眉曰學人不會師曰不會煩禹力湍  
流事不知問如何是西來的的意師乃搦住其僧變  
色師曰我這裏無這箇師手指纖長特異于人號手

### 相大師

韶州林泉和尚

先住巖山僧問如何是塵師曰不覺成丘

山師謁白雲慈光大師辭出白雲門送扶師下階曰  
款款莫教躓倒師曰忽然躓倒又作麼生白雲曰更  
不用扶也師大笑而退

洛京南院和尚問如何是法法不生師曰生也有儒  
士博覽古今時人呼爲張百會一日來謁師師曰莫  
是張百會麼曰不敢師以手於空畫一畫曰會麼曰  
不會師曰一尚不會什麼處得百會來

越州洞巖可休禪師問如何是洞巖正王師曰開著



問如何是和尚親切爲人處師曰大海不宿死屍問如何是向上一路師舉衣領示之問學人遠來請師方便師曰方便了也

定州法海院行周禪師問風恬浪靜時如何師曰吹倒南牆問如何是道中寶師曰不露光曰莫便是否師曰是卽露也

杭州龍井通禪師處樓上座問如何是龍井龍師曰意氣天然別神工畫不成曰爲什麼畫不成師曰出羣不戴角不與類中同曰還解行雨也無師曰普潤無邊際處處皆結粒曰還有宗門中事也無師曰有

曰如何是宗門中事師曰從來無形段應物不曾虧問如何是吹毛劍師曰拽出死屍著

漳州保福院從展禪師福州人也姓陳氏年十五禮雪峯爲受業師十八本州太中寺具戒遊吳楚間後歸執侍雪峯一日忽召曰還會麼師欲近前雪峯以杖拄之師當下知歸作禮而退又常以古今方便詢于長慶稜和尚稜深許之長慶稜和尚有時云寧說阿羅漢有三毒不說如來有二種語不道如來無語只是無二種語師曰作麼生是如來語曰聾人爭得聞師曰情知和尚向第二頭道長慶卻問作麼生是



如來語師曰喫茶去雲居錫云什麼處是長慶向第二頭道處因舉盤山云光境俱亡復是何物洞山云光境未亡復是何物師曰據此二尊者商量猶未得勦絕乃問長慶如今作麼生道得勦絕長慶良久師曰情知和尚向山鬼窟裏作活計長慶卻問作麼生師曰兩手扶犁水過藤一日長慶問見色便見心還見船子麼師曰見日船子且置作麼生是心師卻指船子歸宗柔別云和尚只解問人雪峯謂眾曰諸上座到望州亭與上座相見了到烏石嶺與上座相見了到僧堂前與上座相見了師舉問鷲湖曰僧堂前相見即且置只如望州亭烏石嶺

什麼處是相見鷲湖驟步入方丈師歸僧堂東禪齊云此二

尊宿會處是相見不相見試斷看梁貞明四年丁丑歲漳州刺史王

公欽承道譽創保福禪苑迎請居之開堂日王公禮

跪三請躬自扶掖升堂師曰須起箇笑端作麼然雖

如此再三不容推免諸仁者還識麼若識得便與古

佛齊肩時有僧出方禮拜師曰晴乾不肯去直待雨

淋頭僧乃申問曰郡守崇建精舍大闡真風便請和

尚舉揚宗教師曰還會麼曰恁麼即羣生有賴也師

曰莫把那不淨塗汚人好僧出禮拜師曰大德好與

麼莫覆卻船子問泯默將何為則師曰落在什麼處



曰不會師曰瞌睡漢出去師見一僧乃以杖子打露  
柱又打其僧頭僧作忍痛聲師曰那箇爲什麼不痛  
僧無對玄覺代云問塵騰入漢一藏分明達磨西來  
將何指未師曰上座行腳事作麼生曰不會師曰不  
會會取好莫傍家取人處分若是久在叢林麤委此  
子遠近可以隨處任真其有初心後學未知次序山  
僧所以不惜口業向汝道塵劫來事只在如今還會  
麼然佛法付囑國主大臣郡守昔同佛會今方如是  
若是福祿榮貴則且不論只如當時受佛付囑底事  
還記得麼若識得便與千聖齊肩儻未識得直須諦

信此事不從入得自巳亦非言多去道轉遠直道言  
語道斷心行處滅猶未是在久立珍重異日上堂大  
衆雲集師曰有人從佛殿後過見是張三李四從佛  
殿前過爲什麼不見且道佛法利害在什麼處僧曰  
爲有一分麤境所以不見師乃叱之自代曰若是佛  
殿卽不見僧曰不是佛殿還可見否師曰不是佛殿  
見什麼問十二時中如何據驗師曰恰好據驗曰學  
人爲什麼不見師曰不可更捏目去也問王件重重  
極十方而齊唱如何是極十方而齊唱師曰汝何不  
教別人問問因言辨意時如何師曰因什麼言僧低



頭良久師曰擊電之機徒勞仔思問欲入無為海須  
乘般若船如何是般若船師曰便請曰便恁麼進去  
時如何師曰也是涅槃堂裏漢師見僧喫飯乃托鉢  
曰家常僧曰和尚是什麼心行有尼到參師曰阿誰  
侍者報曰覺師姑師曰既是覺師姑用來作麼尼曰  
仁義道中即不無師自別云和尚是什麼心行玄覺  
法眼見僧擔土乃以一塊土旋擔上云吾助汝僧云  
謝和尚慈悲法眼不肯有一僧別云和尚是什麼心  
行法眼便休玄覺徵云此二則語閩帥遣使送朱記  
印笑為師乃打之僧曰恁麼即山鬼窟裏全因今日  
到師上堂曰去即印住住即印破僧曰不去不住用

也師默而已玄覺云什麼處是山鬼窟叢林中道住  
知此商量正是鬼窟且道保福打伊意作麼生師問僧什麼處來曰江西師  
曰學得底那曰拈不出師曰作麼生法眼別  
云謾語僧無對  
師舉洞山真讚云徒觀紙與墨不是山中人僧問如  
何是山中人師曰汝試翹掠看曰若不點兒幾成翹  
掠師曰汝是點兒曰和尚是什麼心行師曰來言不  
豐師見僧數錢乃展手曰乞我一錢曰和尚因何到  
恁麼地師曰我到恁麼地曰若到恁麼地將取一文  
去師曰汝為何到恁麼地師問僧什麼處來曰江西  
觀音師曰還見觀音麼曰見師曰左邊見右邊見曰



見時不歷左右法眼別云和尚見問如何是入火不燒入水  
 不溺師曰若是水火即被燒溺師問飯頭鑊闊多少  
 曰和尚試量看師以手作量勢曰和尚莫謾某甲師  
 曰卻是汝謾我問欲達無生路應須識本源如何是  
 本源師良久卻問待者適來僧問什麼其僧再舉師  
 乃喝出曰我不患聾問學人近入叢林乞師全示入  
 路師曰若教全示我卻禮拜汝師見一僧乃曰汝作  
 什麼業來得恁麼長大曰和尚短多少師蹲身作短  
 勢僧曰和尚莫謾人好師曰卻是汝謾我師令侍者  
 屈隆壽長老云但獨自來莫將侍者來壽曰不許將

來爭解離得師曰大殺恩愛壽無對師自代曰更謝  
 和尚上足傳示師住保福僅一紀學眾常不下七百  
 其接機利物不可備錄聞師禮重為奏命服唐天成  
 三年戊子示有微疾僧入丈室問訊師謂之曰吾與  
 汝相識年深有何方術相救僧曰方術甚有聞說和  
 尚不解息口法燈別云和尚解息口度又謂眾曰吾旬白來氣力  
 困劣別無他只是時至僧問時既至矣師去即是住  
 即是師曰道曰恁麼即某甲不敢造次師曰失錢遭  
 罪言訖跏趺告寂即三月二十一日也  
 泉州睡龍山道溥號弘教大師福州福唐人也姓鄭



氏寶林院受業自雪峯印心住五峯上堂曰莫道空  
山無祇待便歸方丈僧問凡有言句不出大千頂未  
審頂外事如何師曰凡有言句不是大千頂曰如何  
是大千頂師曰摩醯首羅天猶是小千界問初心後  
學近入叢林方便門中乞師指末師敲門枋僧曰向  
上還有事也無師曰有曰如何是向上事師再敲門  
枋

杭州龍興宗靖禪師台州人也初參雪峯密承宗印  
乃自誓克飯頭服勞逾十載嘗於衆堂中袒一膊釘  
簾雪峯觀而記曰汝向後住持有千僧其中無一人

衲子也師悔過辭歸故鄉住六通院錢王命居龍興  
寺有衆千餘唯三學講誦之徒果如雪峯所誌周廣  
順初年八十一錢王請於寺之大殿演無上乘黑白  
駢攤僧問如何是六通奇特之唱師曰天下舉去問  
如何是六通家風師曰一條布衲一斤有餘僧問如  
何是學人進前一路師曰誰敢謾汝曰豈無方便師  
曰早是屈抑也問如何是和尚家風師曰早朝粥齋  
時飯曰更請和尚道師曰老僧困曰畢竟作麼生師  
大笑而已錢王特加禮重屢延入府以始住院署六  
通大師顯德元年甲寅季冬月示滅壽八十四塔于



大慈山

福州南禪熟璿禪師上堂曰若是名言妙句諸方總道了也今日眾中還有超第一義者致得一句麼若有即不孤負於人時有僧問如何是第一義師曰何不問第一義曰現問師曰已落第二義也問古佛曲調請師和師曰我不和汝雜亂底曰未審為什麼人和師曰什麼處去來  
越州諸暨縣越山師龜號暨真禪師初參雪峯而染指後因闡王請於清風樓齋坐久舉自忽覩日光豁然頓曉而有偈曰

清風樓上赴官齋

此日平生眼豁開

方知普通年遠事

不從葱嶺路將來

歸呈雪峯雪峯然之僧問如何是佛身師曰汝問那箇佛身曰釋迦佛身師曰舌覆三千界師臨終時集

眾示一偈曰

眼光隨色盡

耳識逐聲消

還源無別旨

今日與明朝

偈畢跏趺而逝

南嶽金輪可觀禪師福州福唐人也姓薛氏依石佛寺齊合禪師披剃戒度既圓便參雪峯雪峯曰近前



師方近前作禮雪峯舉足蹋之師忽然冥契師事十  
二載復歷叢林止南嶽法輪峯師上堂謂衆曰我在  
雪峯遭他一蹋直至如今眼不開不知是何境界僧  
問如何是西來意師曰不是大衆夜參後下堂師召  
曰大衆衆迴首師曰看月大衆看月師曰月似彎弓  
少雨多風衆無對問古人道毗盧有師法身有主如  
何是毗盧師法身主師曰不可牀上安牀問如何是  
日用事師撫掌三下僧曰學人未領此意師曰更待  
什麼問從上宗乘如何爲人師曰我今日未喫茶曰  
請師指示師曰過也問正則不問請師俯指師曰抱

取猫兒去師問僧什麼處來曰華光師卽托出閉卻  
門僧無對問路逢達道人將語默對未審將何對  
師曰咄出去師問僧作麼生是覲面事曰請師鑒師  
曰恁麼道還當麼曰故爲卽不可師曰別是一著問  
如何是靈源一路師曰蹋過作麼雪峯院主有書來  
招師曰山頭和尚年尊也長老何不再入嶺一轉師  
迴書曰待山頭和尚別有見解卽入嶺有僧問如何  
是雪峯見解師曰我也驚

泉州福清院玄訥禪師高麗人也初住福清道場傳  
象骨之燈學者歸慕泉守王公問如何是宗乘中事



師叱之僧問如何是觸目菩提師曰闍黎失卻半年糧曰爲什麼失卻半年糧師曰只爲圖他一斗米問如何是清淨法身師曰蝦蟆曲蟾問教云唯一堅密身一切塵中現如何是堅密身師曰驢馬猫兒曰乞師指示師曰驢馬也不會問如何是物物上辨明師展一足示之師住福清三十年大闡玄風終于本山韶州雲門山文偃禪師姑蘇嘉興人也姓張氏初參睦州陳尊宿發明大旨後造雪峯而益資玄要因藏器混衆于韶州靈樹敏禪師法席居第一座敏將滅度遺書于廣主請接踵住持師不忘本以雪峯爲師

開堂日廣主親臨問曰弟子請益師曰目前無異路法眼別云不可無益於人師曰莫道今日謾諸人好抑不得已向諸人前作一場狼籍忽遇明眼人見謂之一場笑具如今亦不能避得也且問你諸人從上來有什麼事欠少什麼向你道無事亦是謾你也須到這田地始得亦莫趁口亂問自己心裏黑漫漫地明朝後日大有事在你若是根性遲迴且向古人建化門庭東觀西觀看是箇什麼道理汝欲得會麼都緣是汝自家無量劫來妄想濃厚一期聞人說著便生疑心問佛問祖向上向下求覓解會轉沒交涉擬心卽差沉復



有言莫是不擬心是麼更有什麼事珍重師上堂云  
我事不獲已向你諸人道直下無事早是相埋沒了  
也你諸人更擬進步向前尋言逐句求覓解會千差  
萬巧廣設問難只是贏得一場口滑去道轉遠有什  
麼休歇時此箇事若在言語上三乘十二分教豈是  
無言語因什麼更道教外別傳若從學解機智得只  
如干地聖人說法如雲如雨猶被呵責見性如隔羅  
縠以此故知一切有心天地懸殊雖然如此若是得  
底人道火不可燒終日說事不曾掛著唇齒未曾道  
著一字終日著衣喫飯未嘗觸著一粒米掛一縷線

雖然如此猶是門庭之說也須實得恁麼始得若約  
衲僧門下句裏呈機徒勞佇思直饒一句下承當得  
猶是瞌睡漢師云三乘十二分教橫說豎說天下老  
和尚縱橫十字說與我捻針鋒說底道理來看恁麼  
道早是死馬醫雖然如此且有幾箇到此境界不敢  
望汝言中有響句裏藏鋒瞬目千差風恬浪靜伏惟  
尚饗珍重師上堂云諸兄弟盡是諸方參尋知識決  
擇生死到處豈無尊宿垂慈方便之詞還有透不得  
底句麼出來舉看老漢大家共你商量時有僧出來  
禮拜擬舉次師云去去西天路迢迢十萬餘問學人



簇簇地商量箇什麼師云大衆久立師云舉一則語  
教汝直下承當早是撒屎著汝頭上直然拈一毫頭  
盡大地一時明得也是剜肉作瘡雖然如此汝亦須  
實到這箇田地始得若未切不得掠虛卻退步向自  
已根脚下推尋看是箇甚麼道理實無絲髮與汝作  
解會與汝作疑惑汝等各各且當人一段事大用現  
前更不煩汝一毫頭氣力便與祖佛無別自是諸人  
信根淺薄惡業濃厚突然起得許多頭角擔鉢囊千  
鄉萬里受屈且汝諸人有什麼不足處大丈夫漢阿  
誰無分觸目承當得猶是不著便不可受人欺謾取

人處分纔見老和尚動口便好把將石驀口塞便是  
屎上青蠅相似鬪競接將去三箇五箇聚頭地商量  
苦屈兄弟他古德一期爲你諸人不奈何所以方便  
垂一言半句通汝入路這般事捨放一邊獨自著此  
子筋骨豈不是有少許相親處快與快與時不待人  
出息不保入息更有什麼身心別處閑用切須在意  
在意珍重師云盡乾坤一時把將來著汝眼睫上你  
諸人聞恁麼道不敢望你出來性燥把老漢打一擱  
且緩緩子細看是有是無是箇什麼道理直饒向這  
裏明得若遇衲僧門下好槌折兩腳汝若是箇人聞



說道什麼處有老宿出世，便好驀面唾污我耳。自汝若不是箇腳手，纔聞人舉，便當荷得。早落第二機也。汝且看他德山和尚，纔見僧上來，拽拄杖便打。趁睦州和尚，纔見僧入門來，便云：現成公案，放汝三十棒。自餘之輩，合作麼生？若是一般掠虛漢，食人涎唾，記得一堆一擔，擡擡到處，馳騁驢唇馬齒，誇我解問十轉五轉話。旣你從朝問到夜論，劫恁麼還曾夢見也。未什麼處是與人著力處？似這般底，有人屈衲僧齋也道：我得飯喫，堪什麼共語？他日閻羅王面前不取你口解說。諸兄弟，若是得底人，他家依衆遣日若也。

未得切莫容易過時。大須子細。古人大有葛藤相爲處，卽如雪峯和尚道：盡大地是汝。夾山云：百草頭上薦取老僧。鬧市裏識取天子。樂普云：一塵纔舉，大地全收。一毛頭師子，全身總是汝。把取翻覆思量。日久歲深，自然有箇入路。此事無你替代處，莫非各在當人分上。老和尚出世，只是爲你證明。汝若有少許來由，且昧你亦不得。你若實未得方便，撥汝則不可。兄弟一等是踢破草鞋，拋卻師長父母行脚。直須著些子精彩，始得實。若有箇入頭處，遇著咬豬狗脚手，不惜性命入泥入水，相爲有可咬嚼。取上眉毛高掛鉢。



囊初折拄杖十年二十年辦取徹頭莫愁不成辦直  
是今生未得徹頭來生亦不失人身向此箇門中亦  
乃省力不虛孤負平生亦不孤負師長父母十方施  
主直須在意莫空遊州獵縣橫擔拄杖一千二千里  
走趁這邊經冬那邊過夏好山水堪取性多齋供易  
得衣鉢苦屈圖他一粒米失卻半年糧如此行腳有  
什麼利益信心檀越把菜粒米作麼生消得直須自  
看時不待人忽然一白眼光落地前頭將什麼抵擬  
莫一似落湯螃蟹手脚忙亂無你掠虛說大話處莫  
將等閑空過時光一失人身萬劫不復不是小事莫

據目前俗字尚道朝聞道夕死可矣況我沙門日夕  
合履踐箇什麼事大須努力努力珍重師云汝等沒  
可作了見人道著祖意便問過超佛越祖之談汝且  
喚那箇爲佛那箇爲祖且說箇超佛越祖底道理問  
箇出三界你把將二界來看有什麼見聞覺知隔礙  
著你有什么聲色可與你了了什麼施以阿那箇爲  
差殊之見他古聖不奈何橫身爲物道箇舉體全真  
物物覲體不可得我向你道直下有什麼事早是相  
埋沒了也實未有入頭處且中私獨自參詳除卻著  
衣喫飯伺來送尿更有什麼事無端起得許多妄想



作什麼更有一般底恰似等閑相似聚頭學得箇古人話路識性記持妄想卜度道我會佛法了也只管說葛藤取性過時更嫌不稱意千鄉萬里拋卻老爺孃師長和尚作這般底去就這打野槌漢有什麼死急行腳師上堂云故知時連澆醜速于像季近白師僧北去禮文殊南去遊衡嶽若恁麼行腳名字比丘徒消信施苦哉苦哉問著黑似漆相似只管取性過時設使有二箇兩箇枉學多聞記持話路到處覓相似言語印可老宿輕忽上流作薄福業他日閻羅王釘你之時莫道無人向你說若是初心後學直須著

精神莫空記人說多虛不如少實向後只是自賺有什麼事近前師上堂大衆雲集師以拄杖指面前云乾坤大地微塵諸佛總在裏許爭佛法各覓勝負還有人諫得麼若無人諫得待老漢與你諫時有僧出云便請和尚諫師云這野狐精師云汝諸人傍家行脚皆是河南海北各各盡有生緣所在還自知得試出來舉看老漢與汝證明有麼有麼出來汝若不知老漢謾你去也汝欲得知若生緣在北北有趙州和尚五臺山有文殊總在這裏若生緣在南南有雪峯臥龍西堂鼓山總在這裏汝欲得識麼向這裏識取



若不見亦莫掠虛見麼見麼且看老僧騎佛殿出去也珍重師上堂云天親菩薩無端變作一條柳標木杖乃畫地一下云塵沙諸佛盡向這裏葛藤便下堂師云我看你諸人二三機中不能構得空披衲衣何益汝還會麼與汝注破久後諸方若見老宿舉一指豎一拂子云是禪是道拄杖打破頭便行若不如此盡是天魔眷屬壞滅吾宗汝若不會且向葛藤社裏看我尋常向汝道微塵刹土三世諸佛西天二十八祖席土六祖盡在拄杖頭上說法神通變現聲應十方一任縱橫你還會麼若不會且莫掠虛然雖據實

實是諦見也未直饒到此田地未曾夢見衲僧沙彌在三家村裏不逢一人師驀起以拄杖畫地一下云總在這裏又畫一下云總從這裏出去珍重師上堂云和尚子衲僧直須明取衲僧鼻孔且作麼生是衲僧鼻孔衆皆無對師云摩訶般若波羅蜜今日大普請下去師上堂云諸和尚子饒你道有什麼事猶是頭上著頭雪上加霜棺木裏瞠眼灸瘡瘢上著艾焦這箇一場狼籍不是小事你合作麼生各自覓取箇托生處好莫空遊州獵縣只欲捉搦閑話待老和尚口動便問禪問道向上向下如何若何大卷抄了塞



在皮袋裏卜度到處火爐邊三箇五箇聚頭口喃喃  
舉更道這箇是公才語這箇是從理道出這箇是就  
事上道遮箇是體語體你屋裏老爺老孃啣卻飯了  
只管說夢便道我會佛法了也將知你行腳驢年得  
箇休歇麼更有一般底纔聞人說箇休歇處便向陰  
界裏閉眉合眼老鼠孔裏作活計黑山下坐鬼趣裏  
體當便道得箇入頭路夢見麼似這般底打殺一萬  
箇有什麼罪過喚作打底不遇作家至竟只是箇掠  
虛漢你若實有箇見處試檢來看共你商量莫空不  
識好惡砑砑地聚頭說閑葛藤莫教老漢見捉來勘

不相當槌折脚莫道不道你還皮下有血麼到處自  
受屈作麼者滅胡種盡是野狐羣隊總在這裏作麼  
以拄杖一時趁下問如何是佛法大意師曰春來草  
自青師問新羅僧將什麼物過海曰草賊敗也師引  
手曰汝爲什麼在我手裏曰恰是師曰更踣跳問牛  
頭未見四祖時如何師曰家家觀世音曰見後如何  
師曰火裏蟭螟吞大蟲問如何是雲門一曲師曰臘  
月二十五問如何是雲嶺泥牛吼師曰天地黑曰如  
何是雲門木馬嘶師曰山河走問從上來事請師提  
綱師曰朝看東南暮看西北曰便恁麼領會時如何



師曰東屋裏點燈西屋裏暗坐問十二時中如何卽  
得不空過師曰向什麼處著此一問曰學人不會請  
師舉師曰將筆硯來僧乃取筆硯來師作一頌曰

舉不顧

卽差互

擬思量

何劫悟

問如何是學人自己師曰遊山翫水曰如何是和尚  
自己師曰賴遇維那不在問一口吞盡時如何師曰  
我在汝肚裏曰和尚爲什麼在學人肚裏師曰還我  
話頭來問如何道師曰去曰學人不會請師道師曰  
闍黎公憑分明何得重判問生死到來如何排遣師  
展手曰還我生死來問如何是父母不聽不得出家

師曰淺曰學人不會師曰深問如何是學人自己師  
曰汝怕我不知問萬機俱盡時如何師曰與我拈卻  
佛殿來與汝商量曰佛殿豈關他事師喝曰這謾語  
漢問如何是教外別傳一句師曰對衆問將來曰直  
得恁麼時如何師曰照從何立問如何是和尚家風  
師曰門前有讀書人問如何是透法身句師曰北斗  
裏藏身問如何是西來意師曰久雨不晴又曰粥飯  
氣問古人橫說豎說猶未知向上一關挨子如何是  
向上一關挨子師曰西山東嶺盡問如何是西來意  
師曰河裏失錢河裏擔師有時坐良久僧問何似釋



迦當時師曰大眾立久快禮三拜師嘗有頌曰

雲門聳峻白雲低

水急遊魚不敢棲

入戶已知來見解

何煩再舉轆中泥

衢州南臺仁禪師問如何是南臺境師曰不知貴曰  
畢竟如何師曰闍黎即今在什麼處師後遷住本郡  
鎮境寺而終

泉州東禪和尚初開堂僧問仁王迎請法王出世如  
何提唱宗乘即得不謬於祖風師曰還奈得麼曰若  
不下水焉知有魚師曰莫閑言語問如何是佛法最  
親切處師曰過也問學人未後來請師最先句師曰

什麼處來問如何是學人已分事師曰苦問如何是  
佛法大意師曰幸自可憐生剛要異鄉邑

餘杭太錢山從襲禪師雪峯之上足也自本師印解  
洞曉宗要常曰擊關南鼓唱雪峯歌後入泐中謁錢  
王王欽服道化命居此山而闡法焉僧問不因王請  
不因眾聚請師直道西來的的意師曰那邊師僧過  
這邊著曰學人不會乞師指示師曰爭得恁麼不識  
好惡問閉門造車出門合轍如何是閉門造車師曰  
造車即不問汝作麼生是轍曰學人不會乞師指示  
師曰巧匠施工不露斤斧



長恨傳金卷十九  
福州永泰和尚問承聞和尚見虎是否師作虎聲僧作打勢師曰這死漢問如何是天真佛師乃批掌曰不會不會

池州和龍山壽昌院守訥號妙空禪師福州閩縣人也姓林氏受業於古田壽峯問未到龍門如何湊泊師曰立命難存有新到僧參師問近離什麼處曰不離方丈師曰不易來僧亦曰不易來師與一掌問如何是傳底心師曰再三囑汝莫向人說問如何是從上宗乘師曰向闍黎口裏著得麼問省要處請師一接師曰甚是省要

建州夢筆和尚問如何是佛師曰不誑汝曰莫便是否師曰汝誑他閩王請師齋問和尚還將得筆來也無師曰不是稽山繡管慚非月裏兔毫大主既垂顧問山僧敢不通呈又問如何是法王師曰不是夢筆家風

福州古田極樂元儼禪師問如何是極樂家風師曰滿自看不盡問萬法本無根未審教學人承當什麼師曰莫寢語問久處暗室未達其源今日上來乞師一接師曰莫閉眼作夜好曰恁麼節優曇華圻曲爲今時向上宗風如何垂示師曰汝還識也無曰恁麼



卽息疑去也師曰莫向大衆竊語問摩騰入漢卽不問達磨來梁時如何師曰如今豈謬曰恁麼卽理出三乘華開五葉師曰說什麼三乘五葉出去福州芙蓉山如體禪師僧問如何是古人曲調師良久曰聞麼曰不聞師示一頌曰

古曲發聲雄

今時韻亦同

若教第一指

祖佛盡迷蹤

洛京鸚鵡山和尚柏谷長老來訪師曰太老去也谷曰還我不老底來師與一擗問駿馬不入西秦時如何師曰向什麼處去

潭州瀉山棲禪師問正恁麼時如何親近師曰汝擬作麼生親近曰豈無方便門師曰開先龍興大藏小藏問如何是速疾神通師曰新衣成弊帛問如何是黃尋橋師曰賺卻多少人問不假物物如何是和尚家風師曰莫作野干聲

吉州潮山延宗禪師資福和尚來謁師下禪牀接資福問曰和尚住此山得幾年也師曰鈍鳥棲蘆困魚止箔曰恁麼卽真道人也師曰且坐喫茶問如何是潮山師曰不宿屍曰如何是山中人師曰石上種紅蓮問如何是和尚家風師曰切忌犯朝儀



益州普通山普明大師問如何是佛性師曰汝無佛性曰蠢動含靈皆有佛性學人爲何卻無師曰爲汝向外求問如何是玄玄之珠師曰這箇不是曰如何是玄玄珠師曰失卻也

隨州雙泉山梁家庵永禪師問達磨九年面壁意如何師曰睡不著護國長老來師問隨陽一境是男是女各申一問問各別長老將何祇對護國以手空中畫一圓相師曰謝長老慈悲曰不敢師低頭不顧問如何得頓息諸緣去師曰雪上更加霜

漳州保福院超悟禪師第二世住問魚未透龍門時如何

師曰養性深潭曰透出時如何師曰纔升霄漢衆類難追曰升後如何師曰慈雲普覆潤及大千曰還有不受潤者無師曰有曰如何是不受潤者師曰直扛撐太陽

太原乎上座徧歷諸方各闡宇宙普遊湖中登徑山法會一日於大佛殿前有僧問上座曾到五臺否師曰曾到曰還見文殊麼師曰見曰什麼處見師曰徑山佛殿前見其僧後適聞川舉似雪峯曰何不教伊入嶺來師聞乃趨裝而邁初上雪峯解院憩錫因分柑子與僧長慶稜和尚問什麼處將來師曰嶺外將



來曰遠涉不易擔負得來師曰柑子柑子方上參峯  
峯禮拜訖立于座右雪峯纔顧視師便下看王事異  
日雪峯見師乃指日示之師搖手而出雪峯曰汝不  
肯我師曰和尚搖頭某甲擺尾什麼不肯和尚曰到  
處也須諱卻一日衆僧晚參雪峯在中庭臥師曰五  
州管內只有這和尚較些子雪峯便起去雪峯嘗問  
師曰見說臨濟有三句是否師曰是曰作麼生是第  
一句師舉目視之雪峯曰此猶是第二句如何是第  
一句師叉手而退自此雪峯深器之室中印解師資  
道成師更不他遊而掌浴室焉一日玄沙上問訊雪

峯曰此間有箇老鼠子今在浴室裏玄沙曰待與和  
尚勘破言訖到浴室遇師打水玄沙曰相看上座師  
曰已相見了玄沙曰什麼劫中曾相見師曰瞌睡作  
麼玄沙卻入方丈白雪峯曰已勘破了雪峯曰作麼  
生勘伊玄沙舉前語雪峯曰汝著賊也鼓山晏和尚  
問師父母未生時鼻孔在什麼處師曰老兄先道晏  
曰如今生也沒道在什麼處師不肯晏卻問作麼生  
師曰將手中扇子來晏與扇子再徵之師默置晏罔  
測乃毆之一拳師在庫前立有僧問如何是觸目菩  
提師踢狗子作聲走僧無對師曰小狗子不消一踢



師不出世諸方日為太原乎上座終于維揚  
南嶽般舟道場寶聞大師惟勁福州人也素持苦行  
不衣繪纈惟壞衲以度寒暑時謂頭陀焉初參雲峯  
深入淵奧復問法玄沙之席心印符會一日謂師上  
座日聞汝註楞嚴經曰不敢師曰二文殊汝作麼  
生註日請師鑒師乃揚袂而去唐光化中入南嶽住  
報慈東藏亦號三藏中有鏡燈一坐即華嚴第二祖  
賢者大師之所製也師觀之頓喻廣大法界重重帝  
網之門佛佛羅光之像因美之曰此先哲之奇功苟  
非具不思議善權之智何以創焉乃著五字頌五章

覽之者悟理事相融後終於南嶽師於梁開平中撰  
續寶林傳四卷紀貞元之後禪門繼踵之源流也又  
製七言覺地頌廣明諸教緣起別著南嶽高僧傳皆  
流傳于世

景德傳燈錄卷第十九

音釋

璠方袁切 鼎奴代切 困渠頑切 桔古勞切 棹吉屑切  
器湍 湍他端切 勦子了切 穀胡谷切 剌一丸切 槿極  
槿克合切 蘇合 嚼在爵切 取側合切 檉卓皆切  
醜澆古堯切 醜澆醜薄也 瞠直視也 灸舉有切 焦子肖切



踣跳踣蒲沒切 蟪他弔切 蟪即消切 蟪落 坵丑厘切 毆  
於口切 勁居正切 續苦誦切 絮之  
捶擊也 勁居正切 續細者曰續

丹陽居士賀學禮施貲刻此  
景德傳燈錄卷二十九計字一萬四百二十箇  
該銀五兩四錢二分  
廬田沙彌性雲對長洲徐普書真州劉文元刻  
萬曆兩季春月徑山寂照庵識

景德傳燈錄卷第二

宋沙門道原纂

吉州青原山行思禪師第六世

洪州雲居山道膺禪師法嗣二十八人

一十九人見錄

杭州佛日和尚

蘇州永光院真禪師

洪州同安丕禪師

廬山歸宗澹權禪師

池州廣濟和尚

潭州水西南臺和尚

歙州朱谿謙禪師

揚州豐化和尚

雲居山道簡禪師

廬山歸宗懷惲禪師

洪州大善慧海禪師

朗州德山和尚



南嶽南臺和尚

雲居山昌禪師

池州嵇山章禪師

晉州大梵和尚

新羅雲住和尚

雲居山懷岳禪師

吟珏和尚

慕

州

璋

潭州龍興寺悟空大師

建昌白雲滅禪師

潭州幕輔山和尚

舒州白水山瑋禪師

廬山洽父山和尚

南嶽法志禪師

新羅慶猷禪師

新羅慧禪師

洪州鳳棲山慧志禪師

已上九人無機緣語句不錄

撫州曹山本寂禪師法嗣一十四人

一十三人見錄

撫州荷玉光慧禪師

筠州洞山道延禪師

衡州育玉山弘通禪師

撫州金峯從志禪師

襄州鹿門處真禪師

撫州曹山慧霞大師

衡州華光範禪師

處州廣利容禪師

泉州廬山小谿院行傳禪師

西川布水巖和尚

蜀川西禪和尚

華州草庵法義禪師

韶州華巖和尚

廬山羅漢池隆山王和尚一人無機緣語句不錄

潭州龍牙山居遁禪師法嗣五人

二人見錄

潭州報慈藏嶼禪師

襄州含珠山審哲禪師

鳳翔白馬弘寂禪師

楚州觀音院斌禪師

撫州崇壽院道欽禪師

已上三人無機緣語句不錄



京兆華嚴寺休靜禪師法嗣三人見錄一人

鳳翔府紫陵匡一禪師

饒州北禪院惟直禪師 濰州化城和尚 已上二人無機緣語句不錄

筠州九峯普滿大師法嗣一人

洪州同安威禪師

青林師虔禪師法嗣六人五人見錄

韶州龍光和尚

襄州石門寺獻禪師

襄州廣德和尚

郢州芭蕉和尚

定州石藏慧炬禪師

襄州延慶通性禪師一人無機緣語句不錄

洛京白馬道儒禪師法嗣二人一人見錄

興元府青剎山和尚

京兆保福和尚一人無機緣語句不錄

益州北院通禪師法嗣一人

京兆香城和尚

高安白水本仁禪師法嗣二人見錄

京兆重雲智暉禪師

杭州瑞龍幼璋禪師

撫州疎山匡仁禪師法嗣二十人十二人見錄

疎山證禪師第二世

洪州百丈安禪師

筠州黃檗慧禪師

洛京靈泉歸仁禪師



隨城山護國守澄禪師

延州延慶奉璘禪師

安州大安山省禪師

洪州百丈超禪師

洪州天王院和尚

常州正勤院蘊禪師

襄州後洞山和尚

京兆三相和尚

筠州五峯山行繼禪師

商州高明和尚

華州西谿道泰禪師

撫州疎山和尚

筠州黃檗山令約禪師

揚州祥光遠禪師

澧州欽山文遠禪師法嗣

安州大安山傳性大師

筠州黃檗山羸禪師

樂普山元安禪師法嗣十人見錄

京兆永安善靜禪師

蘄州烏牙山彥質禪師

鳳翔府青峯傳楚禪師

鄧州中度和尚

嘉州洞谿和尚

京兆臥龍和尚

嘉州黑水寺慧通禪師

京兆盤龍和尚

單州東禪和尚

鄜州善雅和尚

江西逍遙山懷忠禪師法嗣二人

泉州福清師魏禪師

京兆白雲無休禪師

袁州盤龍山可文禪師法嗣五人見錄

江州廬山永安淨悟禪師

袁州木平山善道禪師

陝州龍谿和尚



桂陽志通禪師  
廬山壽昌院淨寂禪師

已上二人無機緣語句不錄

撫州黃山月輪禪師法嗣一人

郢州桐泉山和尚

洛京韶山寰普禪師法嗣二人一人見錄

潭州文殊和尚

祥州大巖白和尚一人無機緣語句不錄

洪州上藍院令超禪師法嗣

河東北院簡禪師已上二人無機緣語句不錄 洪州南平王鍾傳

青原山行思禪師第六世

前洪州雲居山道膺禪師法嗣

杭州佛日和尚初遊天台山嘗曰如有人奪得我機

者即我師矣尋抵于江西謁雲居膺和尚作禮而問

曰二龍爭珠誰是得者雲居曰卸卻業身來相見對

曰業身已卸曰珠在什麼處師無對同安代云回師頭即沒交涉

乃投誠入室便禮雲居為師後參夾山纔入門見維

那維那曰此間不著後生師曰某甲暫來禮謁和尚

不宿維那曰夾山夾山許相見未陞階便問什麼處

來師曰雲居來曰即今在什麼處師曰在夾山頂上



曰老僧行年在坎五鬼臨身師乃上階禮拜夾山又問闍黎與什麼人爲同行師曰木上座曰他何不來相看師曰和尚看他有分曰在什麼處師曰在堂中夾山便共師下到堂中師遂去取得拄杖擲于夾山面前夾山曰莫從天台得來否師曰非五嶽之所生曰莫從須彌山得來否師曰月宮亦不逢曰恁麼卽從他人得也師曰自己尚是冤家從人得堪作什麼曰冷灰裏有一粒豆子爆喚維那來令安排向明窓下著師卻問燈籠還解語也無夾山曰待燈籠解語卽向汝道至明日夾山入堂問昨日新到上座在麼

師出應諾夾山曰子未到雲居前在什麼處對曰天台國清夾山曰天台有潺潺之瀑淥淥之波謝子遠來子意如何師曰久居巖谷不掛松蘿夾山曰此猶是春意秋意如何師良久夾山曰看君只是撐船漢終歸不是弄潮人一日大普請維那請師送茶師曰某甲爲佛法來不爲送茶來維那曰和尚教上座送茶曰和尚尊命卽得乃將茶去作務處搖茶碗作聲夾山迴顧師曰躡茶三五碗意在鑽頭邊夾山曰瓶有傾茶意籃中幾箇甌師曰甌有傾茶意籃中無一甌便傾茶行之時大衆皆舉目師又問曰大衆鶴望



乞師一言來山曰路逢死蛇莫打殺無底籃子盛將  
歸師曰手執夜明符幾箇知天曉夾山曰大眾有人  
歸去歸去從此住普請歸院眾皆仰歎師後迴湘西  
住佛日而終

蘇州永光院真禪師上堂謂眾曰言鋒若去鄉關萬  
里直須懸崖撒手自肯承當絕後再蘇欺君不得非  
常之旨人焉度哉問道無橫徑立者皆危如何得不  
被橫徑所侵去師以拄杖驀口拄曰此猶是橫徑師  
曰合取口

洪州鳳棲山同安不禪師問如何是無縫塔師曰吽

吽曰如何是塔中人師曰今日大有入從建昌來問  
一見便休去時如何師曰是也更來者裏作麼問如  
何是點額魚師云不透波瀾曰慚恥時如何師曰終  
不仰面曰恁麼即不變其身也師曰是也青雲事作  
麼生問如何是和尚家風師曰金鷄抱子歸霄漢玉  
兔懷胎向紫微曰忽遇客來將何祇待師曰金果早  
朝猿摘去玉華晚後鳳銜歸問路逢達道人將語  
默對未審將什麼對師曰要踢要拳問不傷王道如  
何師曰喫粥喫飯曰莫便是不傷王道也無師曰遷  
流左降問玉印開時何人受信師曰不是恁麼人曰



親宮事如何師曰道什麼問如何是毗盧師師曰闍  
黎在什麼處出家問如何是觸自菩提師曰面前佛  
殿問片玉無瑕請師不觸師曰落汝後問玉印開時  
何人受信師曰不是小小問如何是妙旨師云好問  
迷頭認影如何止師云告阿誰曰如何即是師曰從  
人覓即轉遠也曰不從人覓時如何師曰頭在什麼  
處問如何是同安一隻箭師曰腦後看曰腦後事如  
何師曰過也問云僧衣衆人唱祖師衣什麼人唱師  
曰打問將來不相似不將來時如何師曰什麼處著  
問未有者箇時作麼生行履師曰尋常又作麼生曰

怎麼即不改舊時人也師曰作何行履

廬山歸宗寺澹權禪師

第二世

問金鷄未鳴時如何師

曰失卻威音主曰鳴後如何師曰三東平沈問盡身  
供養時如何師曰將得什麼來曰所有不惜師曰供  
養什麼人僧無語問學人爲佛法來如何是佛法師  
曰正閑空曰便請商量師曰周市有餘問大衆雲集  
合譚何事師曰三三兩兩問路逢達道人不將語默  
對未審將什麼對師曰爭能肯得人又曰會麼曰不  
會師曰長安路厠坑子問學人不問諸餘如何是佛  
法大意師曰三枷五棒問通會底人如何道師曰即



今事作麼生曰隨流師曰不隨流爭得息

池州廣濟和尚問匹馬單槍時如何師曰頭落也問如何是方外之譚師曰汝道什麼問如何是廣濟水師曰無饑渴曰恁麼即學人不虛設也師曰情知你受人安排問遠遠來投乞師指示師曰有口只解喫飯問溫伯雪與仲尼相見時如何師曰此間無恁麼人問不識不見請師道出師曰不昧曰不昧時作麼生師曰汝喚作什麼

潭州水西南臺和尚僧問如何是此間一滴水師曰入口即獲出問如何是西來意師曰靴頭線綻問祖知祖相傳未審傳箇什麼師曰不因闍黎問老僧亦不

歙州朱谿謙禪師饒州刺史與師造大藏殿師與一僧同看殿次師喚某甲僧應諾師曰此殿著得多少佛曰著即不無有人不肯師曰我不問者箇人曰恁麼即某甲未曾祇對珍重師後住兜率而終揚州豐化和尚問如何是敵國一著基師曰下來問一棒打破虛空時如何師曰把一片來問上無片瓦下無卓錫學人向什麼處立師曰莫飄露麼雲居山昭化禪師道簡第二世范陽人也久入雲居之



室密受真印而分掌寺務典司樵爨以臘高居堂中  
為第一座屬膺和尚將臨順寂王事僧問誰當繼嗣  
曰堂中簡王事僧雖承言而未曉其旨謂之揀選乃  
與眾僧僉議舉第二座為化主然且備禮先請第一  
座必若謙讓即堅請第二座焉時簡師既密承師記  
略不辭免即自持道具入方丈攝眾演法王事僧等  
不愜素志因循規式師察其情乃棄院潛下山其夜  
山神號泣詰旦王事大眾奔至麥莊悔過哀請歸院  
眾聞山神連聲唱云和尚來也問如何是和尚家風  
師曰隨處得自在問維摩豈不是金粟如來師曰是

曰為什麼卻預釋迦會下聽法師曰他不爭人我問  
橫身蓋覆時如何師曰還蓋覆得麼問蛇子為什麼  
吞卻蛇師曰在裏不傷問諸聖道不得處和尚還  
道得麼師曰汝道什麼處諸聖道不得問路逢猛虎  
時如何師曰千人萬人不逢偏汝便逢問孤峯獨宿  
時如何師曰閑卻七間僧堂不宿阿誰教汝孤峯獨  
宿師示滅後廬州帥張崇施財建石塔于本山至今  
存焉

廬山歸宗寺懷惲禪師第三世問無佛無眾生時如何  
師曰什麼人如此問水清魚現時如何師曰把一箇



來僧無對

同安代云動即失

問如何是五老峯師曰突亢地

問截冰停輪時如何師曰磨不轉曰如何是磨不轉

師曰不停輪問如何是塵中子師曰灰頭土面同安代云

不拂問世尊無說說迦葉不聞聞事如何師曰正恁

麼時作麼生曰不同無聞說師曰是什麼人問學人

不到處請師說師曰汝不到什麼處來上

洪州大善慧海禪師問不坐青山時如何師曰是什麼

麼人問如何是解作客底人師曰不占上問靈泉忽

逢時如何師曰從什麼處來問如何道即不違於師

師曰莫惜口曰道後如何師曰道什麼問如何道得

相親去師曰快道曰恁麼即不道也師曰用口作什

麼師後住百丈而終

朗州德山和尚第七世問路逢達道人不將語默對未

審將什麼對師曰只恁麼僧良久師曰汝更問僧再

問師乃喝出

衡州南嶽南臺和尚問直上融峯時如何師云見麼

雲居山昌禪師第三世問相逢不相識時如何師曰既

相逢為什麼不相識問紅鑪猛燄時如何師曰裏頭

是什麼問不受商量時如何師曰來作什麼曰來亦

不商量師曰空來何益問方丈前容身時如何師曰



汝身大小

池州嵇山章禪師曾在投子作柴頭投子喫茶次謂師曰森羅萬象總在者一椀茶裏師便覆卻茶云森羅萬象在什麼處投子曰可惜一椀茶師後謁雪峯和尚雪峯問莫是章柴頭麼師便作輪椎勢雪峯肯之

晉州大梵和尚問如何是學人顧望處師曰井底豎高樓曰恁麼卽超然也師曰何不擺手

新羅雲住和尚問諸佛道不得什麼人道得師曰老僧道得曰諸佛道不得和尚作麼生道師曰諸佛是

我弟子曰請師道師云不對君王好與二十棒

雲居山懷岳號達空禪師第四世問如何是大圓鏡師

曰不鑑照曰忽遇四方八面來怎麼生師曰胡來胡

現曰大好不鑑照師便打問如何是一丸瘰萬病底

藥師曰汝患什麼

吟珙和尚問學人不負師機還免披毛戴角也無師

曰闍黎也可畏對面不相識曰恁麼卽吞盡百川水

方明一點心師曰雖脫毛衣猶披鱗甲曰好來和尚

具大慈悲師曰盡力道也出老僧格不得

前撫州曹山本寂禪師法嗣



撫州荷玉山玄悟大師光慧初住龍泉上堂謂眾曰  
雪峯和尚爲人如金翅鳥入海取龍相似時有僧問  
和尚如何師曰什麼處去來問如何是西來的的意  
師曰不禮拜更待何時問如何是密傳底心師良久  
僧曰恁麼則徒勞側耳師喚侍者云來燒火著問古  
人道若記一句論劫作野狐精未審古人意如何師  
曰龍泉僧堂未曾鎖曰和尚如何師曰風吹耳聾問  
路逢猛獸時如何師曰慙作麼問如何是聲前一句  
師曰恰似不道問古人云如紅爐上一點雪意旨如  
何師曰惜取眉毛好問如何指示卽不昧於時中師

曰不可雪上更加霜曰恁麼卽全因和尚去也師曰  
因什麼問如何履踐卽得不昧於宗風師曰須道龍  
泉好手曰請和尚好手師曰卻憶鍾期問古人道生  
也不道死也不道意如何師良久僧禮拜師曰會麼  
曰不會師曰也是廚寒甑足塵師有時舉拄杖示眾  
曰從上皆留此一路方便接入時有僧出曰和尚又  
是從頭起也師曰謝相悉問機關不轉請師商量師  
曰啞得我口麼問如何是文殊師曰不可有第二月  
也曰卽今事如何師曰正是第二月問如何是如來  
語師曰猛風可繩縛問如何是妙明真性師曰寬寬



莫搯損師上堂良久有僧出曰為眾竭力禍出私門未審放過不放過師默然問如何是和尚為人一句師曰汝是九色鹿問抱璞投師時如何師曰不是自家珍曰如何是自家珍師曰不琢不成珍

筠州洞山道延禪師第四世住時號鹿頭和尚始因曹山和尚垂

語云有二一人向萬丈崖頭騰身擲下此是什麼人眾

皆無對師出對曰不存曹山曰不存箇什麼曰始得

撲不碎曹山深肯之僧問請和尚密付真心師曰欺

者裏無人作麼

衡州常寧縣育王山弘通禪師問混沌未分時如何

師曰混沌曰分後如何師曰混沌上堂示眾曰釋迦

如來出世四十九年說不到底句今夜某甲不避羞

恥與諸尊者共譚良久云莫道錯珍重問學人有病

請師醫師曰將病來與汝醫曰便請師醫師曰還老

僧藥價錢來問曹源一路即不問衡陽江畔事如何

師曰紅爐飯上無根草碧潭深處不逢魚問心法雙

忘時如何師曰三腳蝦蟇齒大象問如何是西來意

師曰老僧毛豎問如何是佛法大意師曰直待文殊

過即向你道曰文殊過也請和尚道師便打問如何

是和尚家風師曰渾身不直五分錢曰大恁貧寒生



師曰古代如是曰如何施設師曰隨家豐險  
撫州金峯從志號玄明大師有進上座問如何是金  
峯正主師曰此去鎮縣不遙闍黎莫造次進曰何不  
道師曰口如磔盤問千峯萬峯如何是金峯師乃斫  
額而已尚千峯無雲萬里絕霞時如何師曰飛猿嶺  
那邊何不猛吐卻問如何是西來意師曰壁邊有鼠  
耳問如何是和尚家風師曰金峯門前無五里牌師  
後住金陵報恩院入滅謚圓廣禪師塔曰歸寂  
襄州鹿門山華嚴院處真禪師問如何是和尚家風  
師曰有鹽無醋問如何是道人師曰有口似鼻孔曰

忽遇客來將何祇對師曰柴門草戶謝汝經過問祖  
祖相傳是什麼物師曰金襴袈裟問如何是函中般  
若師曰佛殿挾頭六百卷問和尚百年後向什麼處  
去師曰山下李家使牛去曰還許學人相隨也無師  
曰汝若相隨莫同頭角曰諾師曰合到什麼處曰佛  
眼辨不得師曰若不放過亦是茫茫問如何是鹿門  
高峻處師曰汝曾上至山也無問如何是禪師曰鸞  
鳳入鷄籠曰如何是道師曰藕絲牽大象問劫壞時  
此箇還壞也無師曰臨崖覷虎眼特地一場愁問如  
何是和尚轉身處師曰昨夜三更失卻枕子問一句



下豁然時如何師曰汝是誰家生師有一偈示眾曰

一片凝然光燦爛

擬意追尋卒難見

炳然擲著豁人情

大事分明皆總辦

是快活無繫絆

萬兩黃金終不換

任他千聖出頭來

從是向渠影中現

撫州曹山慧霞大師了悟第二世住先住荷玉山問佛未出世

時如何師曰曹山不如曰出世後如何師曰不如曹

山問四山相通時如何師曰曹山在裏許曰還求出

也無師曰若在裏許即求出僧侍立師曰道者可殺

炎熱曰是師曰只如炎熱向什麼處迴避得曰向鑊

湯鑪炭裏迴避師曰只如鑊湯鑪炭作麼生迴避得

曰眾苦不能到師默置

衡州華光範禪師問如何是無縫塔師指僧堂曰此

間僧堂無門戶師問僧曾到紫陵無曰曾到師曰曾

到鹿門無曰曾到師曰嗣紫陵即是嗣鹿門即是曰

即今嗣和尚得麼師曰人情不打即不可問非隱現

是學人阿那箇是和尚師曰盡乾坤曰此猶是學人

阿那箇是和尚師曰適來道不錯

處州廣利容禪師先住貞谿有僧新到師舉拂子曰貞谿

老師還具眼麼曰某甲不敢見人過師曰死在闍黎



景德傳燈錄卷二十  
手裏也問如何是和尚家風師曰謝闍黎道破問西  
院拍手笑嗟嗟意作麼生師曰卷上簾子著問自巴  
不明如何明得師曰不明曰爲什麼不明師曰不見  
道自巴事問魯祖面壁意作麼生師良久曰還會麼  
曰不會師曰魯祖面壁郡守受代歸師出送接話次  
郡守問和尚遠出山門將什麼物來師曰無盡之寶  
呈獻太守無對後有人進語曰便請師曰太守尊嚴  
問千途路絕語思不通時如何師曰猶是堦下漢師  
謂衆曰若到來廣利門下須道得第一句卽開一線  
道與兄弟商量時有僧出禮拜師曰將謂是異國舶

王元來是此郡商人

泉州廬山小谿院行傳禪師青原人也姓周氏本州  
石鐘院出家福州太平寺受戒自曹山印可而居小  
谿問久嚮廬山石門爲什麼入不得師曰鈍漢曰忽  
逢猛利者還許也無師曰喫茶去

西川布水巖和尚問如何是西來意師曰一回思著  
一傷心問寶劍未磨時如何師曰用不得曰磨後如  
何師曰觸不得

蜀川西禪和尚問佛是摩耶降未審和尚是誰家子  
師曰水上卓紅旗問三十六路阿那箇一路最妙師



曰不出第一手曰忽被出頭時如何師曰杳著地也不難

華州草庵法義禪師問如何是祖師西來意師曰爛炒浮漚飽滿喫問擬心即差動念即乖學人如何進道師曰有人常擬爲什麼不差曰即今事如何師曰早成差也

韶州華嚴和尚問既是華嚴還將得來麼師曰孤峯頂上千華秀一句當機對聖明問如何是道師曰靈樹無橫枝天機道合同  
前潭州龍牙山居遁禪師法嗣

潭州報慈藏嶼匡化大師問心眼相見時如何師曰向汝道什麼問如何是實見處師曰絲毫不隔曰恁麼即見也師曰南泉甚好去處問如何是西來意師曰昨夜三更送過江問臨機使用時如何師曰海東有果樹頭心問如何是真如佛性師曰阿誰無問如何是向上一路師曰擲連道永問和尚年多少師曰秋來黃葉落春到便華開師嘗著真贊曰日出連山月圓當戶不是無身不欲全露一日師在帳內坐僧問承師有言不是無身不欲全露請師全露師乃撥開帳法眼別云飽叢林問如何是湖南境師曰樓船載櫂曰

法眼別云飽叢林



還許學人遊翫也無師曰一任闍黎打燈問和尚百  
年後有人問如何祇對師曰分明記取問如何是龍  
牙山師曰益陽那邊曰如何即是師曰不擬曰如何  
是不擬去師曰恁麼即不是問古人面壁意如何師  
良久卻喚某甲僧應諾師曰你去別時來師垂語曰  
一句徧大地一句纔問便道一句問亦不道問如何  
是徧大地句師曰無空缺如何是纔問便道句師曰  
低聲低聲如何是問亦不道句師曰便合知時  
襄州合珠山審哲禪師問如何是深深處師曰寸釘  
入木八牛拽不出問如何是正法眼師曰三門前神

子問如何是佛法大意師曰貧女抱子渡恩愛競隨  
流師問僧曰有亦不是無亦不是有不無俱不是  
汝本來名箇甚麼曰學人已具名了師曰具名即不  
無名箇甚麼曰只者莫便是否師曰且喜沒交涉曰  
如何即是師曰親切處更請一問曰學人道不得請  
和尚道師曰別日來與汝道曰即今爲什麼不道師  
曰覓箇領話人不可得師又問一僧曰姓王姓張姓  
李俱不是汝本來姓箇什麼曰與和尚同姓師曰同  
姓即且從本來姓箇什麼曰待漢水逆流即向和尚  
道師曰即今爲什麼不道曰漢水逆流也未師乃休



前京兆華嚴寺休靜禪師法嗣

鳳翔府紫陵匡一大師師到盤龍見僧問盤龍云碧

潭清似鏡盤龍何處安龍曰沉沙不見底浮浪足噴

吼師不肯自答曰金龍迴透青霄外潭中豈曉玉輪

機盤龍肯之師住後僧問曰未作入身已前作箇什

麼來師曰石牛步步火中行返顧休嗔日中草

前筠州九峯普滿大師法嗣

洪州鳳樓山同安院威禪師問牛頭未見四祖時如

何師曰路逢神廟子見者盡勤拳曰見後如何師曰

室內無靈牀渾家不著孝問祖意教意如何師曰玉

兔不曾知曉意金烏爭肯夜頭明問如何是同安丁

曲師曰靈琴不引入間韻知音肯度柳牙門曰誰人

知得師曰木馬嘶時從彼聽石人拊掌阿誰聞曰知

音如何師曰知音不度耳達者豈同聞

前青林師虔禪師

洞山第 三世法嗣

韶州龍光和尚問人王與法王相見時如何師曰越

國君主不按劍龍光一句不曾虧師上堂良久云不

煩珍重問如何是西來意師曰胡風一扇漢地成機

問撥塵見佛時如何師拊掌顧視問如何是龍光一

句子師曰不空習索曰學人不會師曰掩問如何是



極則爲人處師曰殷勤付囑後人看問賓頭盧一身  
爲什麼赴四天下供師曰千江共一月萬戶盡逢春  
師有偈曰

龍光山頂寶月輪

照耀乾坤燦暗雲

尊者不移元一質

千江影現萬家春

襄州鳳凰山石門寺獻禪師京兆人也自青林受記  
兩處開法凡對機多云好好大哥時謂大哥和尚初  
居衡嶽宴坐巖室屬夾山和尚示寂衆請師住持師  
遂至潭州時楚王馬氏出城延接王問如何是祖師  
西來大道師曰好好大哥御駕六龍千古秀玉階排

仗出金門王仰重延入天冊府供養數日方至來山  
僧問今日一會何異靈山師曰天垂寶蓋重重異地  
湧金蓮葉葉新曰未審將何法示人師曰無絃琴韻  
流沙界清和普應大千機問師唱誰家曲宗風嗣阿  
誰師曰一曲宮商看品弄辨寶須知碧眼胡曰恁麼  
卽清流分洞下滿月照青林師曰多乎塔前分的意  
至今異世度洪音師自來山遷至石門開山創寺再  
闡玄風上堂示徒曰璫璃殿上光輝之日日無私七  
寶山中晃耀之頭頭有據泥牛運步木馬嘶聲野老  
謳歌樵人舞袖太陽路上古曲玄音林下相逢復有



何事問月生雲際時如何師曰三箇童兒抱花鼓好  
好大哥莫來攔我毬門路問如何是和尚家風師曰  
騎駿馬驟高樓鐵鞭指盡胡人路問如何是石門境  
師曰徧界黃金無異色往來遊子罷追尋曰如何是  
境中人師曰無相不居凡聖位經行鳥道沒蹤由問  
衆手淘金誰是得者師曰張三李四出釜門徧握乾  
坤石人在曰恁麼即不從入得也師曰三公九卿排  
班位看取金雞豎也無問道界無窮際通身絕點痕  
時如何師曰渺渺白雲漫雲嶽轉身玄路莫遲遲曰  
未審轉身路在什麼處師曰石人舉手分明記萬年

枯骨笑時看問如如不動時如何師曰有什麼了曰  
曰如何即是師曰石声非關鎖問如何是石門境師  
曰烏鳶飛叫頻曰如何是境中人師曰風射舊簾櫳  
因般若寺遺焚有人問曰既是般若爲什麼被火燒  
師曰萬里一條鐵

襄州萬銅山廣德和尚第一世問如何是和尚家風師  
曰山前人不住山後更茫茫問如何是透法身句師  
曰無方登山水茆戶絕知音問如何是佛法大意師  
曰始嗟黃葉落又見柳條青問盡大地是二箇死處  
向什麼處葬師曰北邙山下千丘萬丘師因不安僧



問和尚患箇什麼太羸瘦生師曰無思不墜的曰恁麼卽知和尚病源也師曰你道老僧患什麼曰和尚思口好師便打

郢州芭蕉和尚僧問十二時中如何用心師曰攏揔一木盆

定州石藏慧炬和尚問如何是伽藍師曰只者箇曰如何是伽藍中人師曰作麼作麼曰忽遇客來將何祇待師曰喫茶去

前洛京白馬遁儒禪師法嗣

興元府青剎山和尚問如何是和尚家風師曰無底

籃子拾生菜問如何是白馬境師曰三及華木秀九夏雪霜飛

前益州北院通禪師法嗣

京兆香城和尚初參通和尚問一似兩箇時如何通曰一箇賺汝師乃省悟問三光景色謝照燭事如何師曰朝邑峯前卓五彩曰不涉文采事作麼生師曰如今特地過江來問向上一路請師舉唱師曰釣絲鉤不出問牛頭還得四祖意否師曰沙書不點落千字曰下點後如何師曰別將一撮俵入夫曰恁麼卽人人有分也師曰汝又作麼生問囊無繫磴之絲廚



絕聚蠅之糝時如何師曰日捨不求思從妄得  
前高安白水本仁禪師法嗣

京兆重雲智暉禪師咸秦人也姓高氏總角之歲好  
遊佛宇誓志出家父不能止禮圭峯溫和尚剃度後  
謁高安仁和尚獨領微言潛通祕鍵尋回洛卜于中  
灘創溫室院常施藥有比丘患白癩眾惡之惟師延  
迎供養與摩洗垢穢斯須有神光異香既而辭去遂  
失所在所遺瘡痂馨香酷烈遂聚而塑觀音像以藏  
之梁開平五年忽思林泉乃歸終南圭峯舊居師一  
日閑步巖岫間倏覩摩衲數珠銅瓶櫻筍觸之即壞

謂侍者曰此吾前身道具耳欲就茲建寺以贖昔因  
當雜草開基有祥雲蔽日屯于峯頂久而不散因日  
為重雲山先是谷多猛獸皆自引去及塞龍潭以通  
徑潭中龍亦徙他所後唐明宗賜額曰長興學侶臻  
萃師上堂有僧問如何是歸根得旨師曰早是忘卻  
問不意塵生如何是進身一路師曰足下已生草前  
程萬丈坑問要路坦然如何履踐師曰我若指汝則  
南北東西去也問佛未出世時如何師曰一堆泥土  
問如何是重雲稱師曰任將天下勤問如何是截鐵  
之言師曰寧死不犯問如何是重雲境師曰四時不



開華三冬盛芳草師再歸故山創寺聚徒涉四十五  
寒暑誨人之暇撰歌頌千餘首度弟子一千五百人  
永興節度使王彥超早遊師戶庭嘗欲拔師止之  
曰汝當後榮顯為教門外護則可矣厥後果如師言  
及鎮永興與師再會益加尊禮周顯德三年丙辰夏  
六月師詣府辭王公屬以山門事至七月二十四日  
體中無恙垂誠門人併示一偈曰

我有一間舍

父母為修蓋

住來八十年

近來覺損壞

早擬移他處

事涉有憎愛

待他摧毀時

彼此無相礙

跏趺而逝壽八十有四臘六十四塔于本山  
杭州瑞龍院幼璋禪師唐相國夏侯孜之猶子也大  
中初伯父司空出鎮廣陵師方七歲遊慧照寺聞誦  
蓮經志求出家伯父初不允因絕不飲食不得已而  
許之禮慧遠為師十七具戒二十五遊諸禪會暮山  
白水咸受心訣二宗匠深器之咸通十三年至江陵  
會騰騰和尚囑之曰汝往天台尋靜而棲遇安即止  
又值憨憨和尚撫而記曰汝卻後四十年有巾子峯  
下菩薩王於江南當此時吾道昌矣二逸士各有密  
言授之尋抵天台山於靜安鄉創福唐院乃契騰騰



之言又眾請住隱龍院中和四年浙東飢疫師於溫  
 台明三郡收瘞遺骸數千時謂悲增大士乾寧中雪  
 峯和尚經遊遺師椽欄拂子而去天祐三年錢尚父  
 遣使章建齋衣服香藥入山致請師領徒至府庭署  
 志德大師就功臣堂安置日請說法要師請於每年  
 建金光明道場諸郡黑白大會逾月而散天台光明大會始於  
 師將歸山王加戀慕於府城建瑞龍院文穆王改爲寶  
 院延請開法時禪門興盛斯則憨憨懸記應矣師上  
 堂謂眾曰老僧頃年遊歷江外嶺南荆湖但有知識  
 叢林無不參問來蓋爲今日與諸人聚話各要知箇

去處然諸方終無異說只教當人歇卻狂心休從他  
 覓但隨方任真亦無真可任隨時受用亦無時可用  
 設垂慈苦口且不可呼晝作夜更饒善巧終不能指  
 東爲西脫或能爾自是神通作怪非于我事若是學  
 語之輩不自省已知非直欲向空裏采華波中取月  
 還著得心力麼汝今各且退思忽然肯去始知瑞龍  
 老漢事不獲已迂迴太甚還肯麼問如何是瑞龍境  
 師曰汝道不見得麼曰如何是境中人師曰後生可  
 畏問廓然無雲如何是中秋月師曰最好是無雲曰  
 恁麼卽一輪高掛萬國同觀去也師曰捏目之子難



與言至天成二年丁亥夏四月師乞墳塔尚父命陸  
仁璋於西關選地建塔創院賜名額令僧守護仍改  
天台隱龍為隱迹修塔畢師入府庭辭尚父囑以護  
法恤民之事剋期順寂尚父悲悼遣僧正集在城宿  
德迎引入塔壽八十有七臘七十

前撫州疎山匡仁禪師法嗣

疎山證禪師

第二世

初參仁和尚得旨後遊歷諸方謁

投子同禪師投子問曰近離甚處曰延平來投子曰  
還將得劍來麼曰將得來投子曰呈似老僧看師乃  
指面前地上投子便休師遂去三白後投子問王事

新到僧在什麼處曰當時去也投子曰三十年學馬  
伎昨日被驢撲師住後僧問如何是就事學師曰著  
衣掃地曰如何是就理學師曰騎牛去穢曰向上事  
如何師曰溥際不收問如何是聲色中混融一句師  
曰不辨消不及曰如何是聲色外別行一句師曰難  
逢不可得

洪州百丈安和尚號明照禪師

第十世

問一藏圓光如

何是體師曰勞汝遠來曰莫是一藏圓光麼師曰更  
喫一碗茶問如何是和尚家風師曰手巾寸半布問  
萬法歸一一歸何處師曰未有一箇不問問如何是



極則事師曰空王殿上登九五野老門前不立人問  
隨緣認得時如何師曰未認得時作麼生師本新羅  
國人自百丈統衆所度弟子道直等凡七人各從參  
嗣僉化一方師滅後門人寫影法眼贊曰對目誰寫  
蟾輝碧池日面月面輪圓須彌須彌一指月面豪芒  
明照禪師詎曰違方方塵不指大悲何起我謂玄功  
胡是非是

筠州黃檗山慧禪師洛陽人也少出家業經論學因  
增受菩薩戒而歎曰大士攝律儀與吾本受聲聞戒  
俱止持作犯也然於篇聚增減支本通別制意且殊

既微細難防復於攝善中未嘗行於少分况饒益有  
情乎且世間泡幻身命何可留戀哉由是置講課欲  
以身捐於水中飼鱗申之類念已將行偶二禪者接  
之款話謂南方頗多知識師何滯於一隅也師從此  
回意參尋屬關津嚴緊乃謂守吏曰吾非翫山水誓  
求祖道他由必不忘恩也守者察其志遂不苛留且  
謂之曰師既爲法忘軀同時願無吝所聞師欣謝直  
造踈山時仁和尚坐法堂受參師先顧視大衆然後  
致問曰刹那便去時如何踈山曰畱塞虛空汝作麼  
生去師曰畱塞虛空不如不去踈山便休師下堂參



第一座座曰適觀座主祇對和尚語甚奇特師曰此  
乃率爾實自偶然敢望慈悲開示愚迷座曰一刹那  
間還有擬議否師於言下頓省禮謝退於茶堂悲喜  
交盈如是三日尋住黃檗山聚眾開法第二終于本  
山今塔中全身如生

隨州隨城山護國院守澄淨果大師問如何是佛師  
曰者驢漢問盡大地是一隻眼底人來師如何師曰  
塔下漢問諸佛不到處什麼人履踐師曰聃耳鬚頭  
曰何人通得彼中信師曰驢面獸頭問隨緣認得時  
如何師曰錯問如何是西來意師曰一人傳虛萬人

傳實問不落干將手如何是太阿師曰七星光采耀  
六國罷煙塵

洛京長水靈泉歸仁禪師問如何是祖師意師曰仰  
面獨揚眉回頭自拍手問如何是祖師西來的的意  
師曰洛河水逆流問如何是和尚家風師曰騎牛戴  
席帽過水著靴衫

延州伏龍山延慶院奉璘禪師問如何是和尚家風  
師曰橫身臥海日裏挑燈問如何是伏龍境師曰山  
峻水流急三春足異華問和尚還愛財色也無師曰  
愛曰既是善知識為什麼卻愛財色師曰知恩者少



負恩者多師問火頭培火了未曰低聲師曰什麼處  
得者消息來曰不假多言師曰省錢易飽喫了還饑  
問如何是和尚家風師曰長齋冷飯曰又大寂寞生  
師曰僧家合如是

安州大安山省禪師

世第二

問失路迷人請師直指師

曰三門前去問舉步臨危請師指月師曰不指月曰  
爲什麼不指月師曰臨坑不推人問離四句絕百非  
請和尚道師曰我王庫內無如是刀問重重關鎖信  
息不通時如何師曰爭得到者裏曰到後如何師曰  
彼中事作麼生問如何是真中真師曰十字路頭泥

佛子

洪州大雄山百丈超禪師海東人也問祖意與教意  
同別師曰金鷄玉兔聽繞須彌問日落西山去林中  
事若何師曰洞深雲出晚澗曲水流遲僧辭問曰今  
日下山有人問和尚說什麼法向他道什麼師曰但  
向他道大雄山上虎生師子兒

洪州天王院和尚問國內按劍者是誰師曰天主問  
百骸俱潰散一物鎮長靈如何師曰不墮無壞爛問  
如何是佛師曰錯

常州正勤院蘊禪師

世第一

魏府人也姓韓氏幼而出



家老有童顏得法於踈山之室問師唱誰家曲宗風  
嗣阿誰師曰適然簫韶外六律不能過曰不過底事  
作麼生師曰聲前拍不散句後覓無蹤問如何是正  
勤一條路師曰泥深三尺曰如何得到師曰闍黎從  
什麼處來問如何是禪師曰石裏蓮華火裏泉曰如  
何是道師曰楞伽峯頂一莖草曰禪道相去多少師  
曰泥人落水木人撈師晉天福中將順寂預告大眾  
及期合城士女奔走至院師囑付訖怡然坐化門人  
葬于院後經一二稔發塔覩全身儼然髮爪俱長乃於  
城東閣維收舍利真骨重建塔

襄州後洞山和尚問道有又無時如何師曰龍頭蛇  
尾腰間一劍

京兆三相和尚問如何是無縫塔師曰覓縫不得曰  
如何是塔中人師曰對面不得見

前樂普元安禪師法嗣

京兆永安院善靜禪師京兆人也姓王氏父任牧守  
母因夢金像覺而有娠師幼習儒學博通羣書年二  
十七忽厭浮幻潛詣終南山禮廣度禪師披削受具  
唐天復中南謁樂普安禪師安器之容其入室仍典  
園務力營衆事有僧辭樂普普曰四面是山閣黎向



什麼處去僧無對樂普曰限汝十日內下語得中卽  
從汝去其僧冥搜久之無語因經行偶入園中師怪  
問曰上座豈不是舜去今何在此僧具陳所以堅請  
代語師不得已代曰竹密不妨流水過山高那阻野  
雲飛其僧喜踊師囑之曰祇對和尚時不須言是善  
靜語也僧遂白樂普普曰誰下此語曰某甲樂普曰  
非汝之語僧具言園頭所教樂普至晚上堂謂衆曰  
莫輕園頭他日住一城隍五百人常隨也師尋舜樂  
普北還故山結廬而止道俗歸向復遊峨眉迥住興  
元連師王公禮重後歸故鄉屬兵火之後舊寺荒廢

節師創永安禪苑以居之徒衆五百餘僧問知有道  
不得時如何師曰知有箇什麼曰不可無也師曰恁  
麼卽合道得曰道卽不無爭奈語偏師曰水凍魚難  
躍山寒華發遲問如何是衲衣向上事師曰龍魚不  
出海水月不吞光問不可以智知不可以識識時如  
何師曰鶴鷺竝頭踏雪睡月明驚起兩遲疑問如何  
是西來意師曰壁上畫粘松蜂來不見藥問牛頭未  
見四祖時如何師曰異境靈松覩者皆羨曰見後如  
何師曰葉落已枝摧風來不得韻問如何得生如來  
家師曰披衣望曉論劫不明曰劫後如何明師曰一



句不可得師往遊魏道被昭宗蒙塵之亂以晉開運  
丙午歲冬鳴犍推集僧囑累入方丈東向有脅而化  
壽八十有九臘六十教謚淨悟禪師

蘄州烏牙山彥賓禪師問未作人身以前作什麼來  
師曰三脚石牛坡上走一枝瑞氣月前分問匹馬單  
槍直入時如何師曰饒你雄性解拈槍猶較秦王一  
步在問久戰沙場爲什麼功名不就師曰雙鷗隨箭  
落李廣不當名問百步穿楊中的者誰師曰將軍不  
上便橋金牙徒勞拈苦問蟬螻飲雲根時如何師曰  
金輪天子下閻浮鐵饅頭上金華異

鳳翔府青峯山傳楚禪師涇州人也性淳貌古眼有  
三角承樂普開示心地俾幸于眾事一日樂普問曰  
院主汝去什麼處來師曰掃雪來曰雪深多少師曰  
樹上總是曰得卽也得汝向後有山住箇雪窟定矣  
自受記乃訪于白水白水問樂普有生機一路是否  
師曰是白水曰止卻生路向熟路上來師曰生路上  
死人無數熟路上不著活漢白水曰此是樂普底汝  
作麼生師曰非但樂普夾山亦不奈何曰夾山爲什  
麼不奈何師曰不見道生機一路師住後有僧問佛  
魔未現向什麼處應師曰諸上座聽祇對問如何是



臨機一句師曰便道將來曰請和尚道師曰穿過關  
驢不知痛處問如何是明了底人一句師曰駿馬寸  
步不移鈍鳥昇騰出路

鄧州中度和尚問海內不逢師如何是寰中主師曰  
金鷄常報曉時人不自知問如何是暗中明鏡師曰  
萬機昧不得曰未審照何物師曰什麼物不照問如  
何是實際理地不受一塵佛事門中不捨一法師曰  
真常塵不染海內百川流問請和尚離聲色外答師  
曰木人常對語有性不能言

嘉州洞谿和尚初問樂普月樹無根枝覆蔭請師直

指妙幽微樂普曰森羅秀處事不相依瀑水千波孤  
峯自異師於是領旨承嗣問蛇師為什麼被蛇吞師  
曰幾度扣門拈不出

京兆臥龍和尚初開堂有僧問杲曰符天際珠光照  
舊都浦津通法海今日意如何師曰寶劍揮時豈說  
明暗

前江西逍遙山懷忠禪師法嗣

泉州福清院師魏和尚號通玄禪師僧問枝分夾嶺  
的紹逍遙寶座既登法雷請震師曰逍遙迥物外物  
外霞不生問如何是西來的的意師曰立雪未為勞



斷臂方為的曰恁麼卽一華開五葉芬芳直至今師  
曰因圓三界外果滿十方知

京兆白雲無休禪師問路逢猛虎如何降伏師曰歸  
依佛歸依法歸依僧問如何是白雲境師曰月夜樓  
邊海客愁

前袁州盤龍山可文禪師法嗣

江州廬山永安淨悟禪師僧問如何是出家底事師  
曰萬丈懸崖撒手去曰如何是不出家底事師曰迥  
殊雪嶺安巢節有異許由掛一瓢問六門不通如何  
通信師曰闍黎外邊與誰相識問脫龍頭卻為馱來

時如何師曰換骨沈腸投紫塞洪門切忌更嘶蘆問  
從上諸聖將何示人師曰有異祖龍行化節迥超接  
鳳越揚塵問如何是解作客底人師曰寶御珍林猶  
尚棄誰能歷劫傍他門問衆手淘金誰是得者師曰  
黃帝不曾遊赤水珠承罔象也虛然問雪覆蘆華時  
如何師曰雖則沍疑呈瑞色太陽輝後卻迷人

袁州木平山善道禪師初謁樂普問一漚未發已前  
如何辨其水脉樂普曰移舟諳水勢舉擢別波瀾師  
不愜意乃參盤龍語同前問盤龍曰移舟不辨水舉  
擢卽迷源師從此悟入僧問如何是西來意師曰石



羊頭子向東看問如何是正法眼師曰拄杖孔問如何是不動尊師曰浪浪宕宕問如何是木平一句師曰昂塞虛空曰昂塞虛空即不問如何是一句師乃打之師凡有新到僧未許參禮先令運土三擔而示偈曰

南山路仄東山低

新到莫辭三擔泥

嗟汝在途經日久

明明不曉卻成迷

師肉髻羅紋金陵李氏嚮其道譽迎請供養待以師禮嘗問如何是木平師曰不動斤斧曰如何不動斤斧師曰木平時大法眼禪師有偈贈曰

木平山裏人

貌古言復少

相看陌路同

論心秋月皎

壞衲線非蠶

助歌聲有鳥

城闕今白來

一漚曾已曉

師異迹頗多此不繁述滅後門人建塔刊石影本國謚真寂禪師塔曰普慧

陝府龍谿和尚上堂謂眾曰直饒說似箇無縫塔也不免老僧下一箇檝作麼生免得下檝眾無對師自代曰下去僧問如何是無縫塔師曰百寶莊嚴今已了四門開豁已多時

前撫州黃山月輪禪師法嗣



郢州桐泉山和尚初參黃山問天門一合十方無路  
有人道得擺手出漳江師對曰蟄戶不開龍無龍句  
黃山曰是你恁麼道師曰是則直言是不是直言不  
是黃山曰擺手出漳江黃山復問下和到處荆山秀  
玉印從他天子傳時如何師曰靈鶴不於林下憩野  
老不重太平年黃山深肯之師住後僧問如何是相  
傳底事師曰龍吐長生水魚吞無盡漚問請師挑掃  
師曰播鼓轉船頭擢挑波裏月  
前洛京韶山寰普禪師法嗣  
潭州文殊和尚僧問如何是祝融峯前事師曰巖前

瑞草生問仁王登位萬姓霑恩和尚出世何如師曰  
萬里長沙駕鐵船問如何是本爾莊嚴師曰菊華原  
上景行人去路長

景德傳燈錄卷第二十

音釋

暉於粉切 嵇胡鷄切 吟良郢切 瑋羽鬼切 嶼似與切 斌  
甲民切 璘力珍切 鄜方朱切 潺水山切 瀑蒲木切  
涿盧谷切 醜色也 醜味魚念切 攬屋統切 磬楚黠切 搯察同切 搯克盍切  
也綠也 榔丑林切 儼徒亘切 噴噴在凡切 峴山銳貌 爲專以切  
也鳩也 櫛盧紅切 攏力董切 鯨魚豈切 參桑感切 鍵渠



鍵切關也 痂古牙切乾瘍也 飼詳吏切餽也 聃丁含切耳大垂也 鬢步崩切髮短也  
 娠孕也 疋徒浪切 掃與他切 搯盧對切擊鼓也 搯盧對切擊鼓也 搯盧對切擊鼓也  
 歷也練也 宕徒浪切 掃與他切 搯盧對切擊鼓也 搯盧對切擊鼓也 搯盧對切擊鼓也  
 娠孕也 疋徒浪切 掃與他切 搯盧對切擊鼓也 搯盧對切擊鼓也 搯盧對切擊鼓也  
 歷也練也 宕徒浪切 掃與他切 搯盧對切擊鼓也 搯盧對切擊鼓也 搯盧對切擊鼓也

冊陽居士賀學禮施貲刻此  
 景德傳燈錄卷二十計字一萬三千二百六  
 十箇該銀六兩九錢五分  
 安城沙門可震對長洲徐普書上元陶邦本刻  
 萬曆丙午季春月徑山寂照庵識



